

光緒山西通志

鄉賢錄十九

錄二之十九

山西通志第百三十四

贈士出身頭品頂戴兵部侍郎兼都察院右副都御史巡撫山西督辦軍務布政使司張鈞舉

旨監修

國朝 雍正乾隆

張元林字德滋陽曲人雍正甲辰武舉第一由保舉授神木知縣地近邊陲關禁苛煩吏緣爲奸爲請給路引商賈便之鄂爾多斯子女賣入內地有年久不願奉贖者相率悲泣甚至自戕乃捐廉倍償原主願留者聽後其王又奏請禁邊民墾種尙書班赴陝勘議元林挺身見班力陳內地謀食之艱請編戶輸賦示以限制班從其議奏行之乾隆二年兼署府谷値旱荒請帑振濟揭甫上卽發倉預給有代危者元林曰距省二千餘里必待得請民無遺類矣葭州監生吳某妻病

死妻父誣與妾毒其女已擬抵矣大吏疑之檄元林覆審廉得其實釋之九年升乾州艱歸起補綏德州設官船渡行旅並請豁河灘地糧州民有兄利弟產殺弟而僞以盜報者元林前夕夢人以杵碎臼醒而異之往驗疑其情狀忽觸前夢嚴鞠獲血衣遂得實置諸法以最擢守開封南河決奉委協辦風雪沴寒不憚勞苦由是得疾告歸厯官二十餘年清操彌勵嘗攝南汝光道值新疆用兵承辦軍需嚴飭屬吏出納維謹後冒銷事發惟元林與其屬無所染廉聲著一時年七十卒子成年由貢生選五案訓導以善書聞

高尙禮字子敬陽曲人領丙午鄉薦以保舉知縣需次江西歷署南昌豐城廉幹有聲兩縣民俱頌之志入名宦乾隆辛酉以親老乞歸囊橐蕭然資授徒以養者及二十年起補直

溪縣尋調彭澤所至多惠政南城吳紘時家居號於寂曰令彭澤者晉陶淵明唐狄梁公白香山彭人祀爲三賢今得高公而四矣其爲人所欽服若此在縣七年以失察江盜鑄級年已七十矣遂歸未幾卒尙禮學問淹博矜尙名節而不爲矯激之行厯宰大邑能以儒術飾吏治後進以文就正者經其指授多獲成名鄉里奉爲祭酒焉子霖官巡檢雯乾隆己亥舉人

李如蘭字長芳先世由榆次徙居陽曲遂隸籍以貢選澤州訓導雍正初例改主簿引

見奏對稱

旨特授高郵州知州驛僱募挽夫歲耗民間數千金而所募率流丐滋騷擾下車首革之州西甓社湖驟凍客舟多膠湖

中設法用小舟二編竹聯底行冰上如轉輪頃刻濟一時爭
效之在州九月積案悉清擢知江甯府尋遷廬鳳兵備道懷
遠壽州數百里湖港交通久爲盜藪往往藉捕漁爲業訪得
主名率健卒夜抵其巢以計擒誅之而令漁船皆編號並增
塘汛嚴保甲盜無所隱江路肅然進四川按察使屢獄疑獄
多所平反刊決獄近事比領州縣以爲用刑之準調江西尋
升四川布政司重農桑實倉儲鉛銅就地開採省滇粵遠運
勞費乾隆九年後災祲頻仍設法振救民樂更生成都華陽
兩縣以附郭舊例領銀納米以給兵餉民苦之言於總督別
設法令與外州縣均贍對金川相繼用兵饋運無乏尋以勞
致疾卒於官如蘭少敦行義喜讀書熟於掌故負幹濟才於
民生利病吏治得失講求有素故所至皆有政績可紀子天

培永祺別有傳

武一韓字文起太谷人丙午進士授懷安縣知縣潔已愛民興利除弊尤以培植人才爲急聚諸生立文社親課之地舊爲邊衛絕科第者幾三十年至是遂有舉於鄉者以事去官士民遮道泣送生平學有根柢長於古文凡所著述皆講明經世之務不屑屑於章句雍正己酉乾隆己未兩脩縣志纂輯皆出其手縣人服其公允無異辭卒祀懷安名宦

孫慶槐字符蔭興縣人壬子舉於鄉明年成進士授禮部主事厯員外郎郎中出爲雷州知府卒於官慶槐爲文定從孫在都日從之遊研究性命之旨論學以敬爲本內行修飭與諸弟極友愛居官寅清自矢以實心行實政嘗葺雷陽書院優其月餽暇輒與諸生講學一時翕然宗之臨終遺二子詩

有歸囊誓不問餘錢之句雷人傳謠之

楊二酉字學山太原人癸丑進士選庶吉士授編修以工書入直每進一帙輒拜文綺之賜轉貴州道監察御史巡視臺灣請建書院免臺屬積逋臺民比戶戶祝焉尋升工科給事中轉兵科掌印給事中奏停採買減關稅除耗羨又論浙中兵餉銀色粵中土豪虐民等事疏上皆報可以老乞歸年七十六卒

王璋字石林太平人雍正癸卯舉人令常山民俗賣產者率貪厚價地去糧存久之公私大累下車詳請清丈俾糧地相從厯年逋賦概予蠲免常人德之兩膺薦擢分防乾州同知會勦金酋及逆苗輸餉著勞乾隆十年升授寶慶知府正己率屬三年卒於官璋所至建立書院甄陶士類多治績卒

後咸立祠祀之性嗜書工詩畫著有洗桐居士集木菴遺稿
王師字貞甫臨汾人父理躬字翼之康熙中吳三桂反以武
舉授名兵部請自効從大軍復漢中賊平授蘇州守備尋調
守遼城以廉節稱歸田後貧至無以自給云師幼敏悟讀書
目數行下舉康熙癸巳鄉試雍正庚戌成進士知元城縣王
勝瞳地久荒詳除其賦而時導民樹藝卒易沙田爲沃土遇
歲少祲卽開倉振貸不待請而行或輸俸錢爲貸者捐補追
呼以息歲時進諸生親爲講畫示以經史大要職再滿循聲
茂著乾隆四年調知清苑民某以奇冤論死決有日而某所
聘妻痛夫罹非辟晉同日死道路憐之流言謂惜王青天不
早至致冤斃二命王青天者元城人所呼而清苑仍之者也
師旣微聞其事廉得冤狀力請於大吏復鞠竟脫焉五年遷

冀州知州尋知真定府擢分巡清河道九年隨大學士高斌
吏部尙書劉于義勾當直隸水利周厯保定河間天津真定
諸郡所擘畫事宜多被採用功成

上聞而贊之十年遷直隸按察使尋遷浙江布政使九月調任
江南督辦淮海災賑甚周悉蘇俗尙迎賽舉國若狂至是少
革焉明年以他故降補天津巡道越三年復爲浙江布政使
是時兩江總督等以士民望幸請

上南巡報可師善體

上意絲栗不以累民處以鎮靜民若不知有此大事者風聞於
上而江督黃頤以供帳擾民爲御史所糾乃特擢師江蘇巡撫
明年

駕至召問民間疾苦陳奏無隱及旋

蹕扈從

御筆書吳會清風四大字以

賜時論大臣榮遇名實克副者必首推師黃荷殊眷威名震一時亦爲心折於

上前力譽之自是獨用愈殷而黃旋以人地不宣調督陝甘去師素撲誠感知遇亟思報稱中夜數起或無故泣下遇事盡瘁遂於是年八月卒年六十二撫江蘇纔七閱月未盡其施設然已除劇賊平米價整飭書院申明吏課氣象煥然一新時

特詔舉經學師以陳祖范顧棟高應旣而廷臣核實海內止四人皆授國子監司業二人與焉卒後家無餘資侍郎沈德潛志其墓以古清白吏稱之子亶望由舉人厯官浙江巡撫

乾隆四十六年以甘肅冒賑案伏法孫十一人並戍伊犁五十九年

上閔國史館所進王師列傳念爲

國家良臣因子貪贓營私以致絕嗣於心不忍特免諸孫釋回鄉里延其宗祀

朱佐湯字萊公臨汾人雍正己酉庚戌聯捷進士初任甘肅徽縣令調知甯夏升靈州知州晉甯夏府知府陝西延綏鄜道署陝西按察使調河東鹽運使再調山東兗沂曹道致仕旋里年七十四卒佐湯生而穎異家甚貧發憤積學筮仕後明察獄訟培養膠庠疏通水利所至多治績由令長淳至監司歟歷數十年號爲循良吏天性和易與物無猜人以長者稱之而操守廉介遇事當機立斷無依違顧忌在甯夏時兵

有預支糧餉者歲暮當扣抵衆不可而當事者持之益力遂
徇徇欲變佐湯方以事出外聞之乘驛歸諭之乃定其爲人
信服如此旣歸行李蕭條家無長物布衣蔬食時攜杖出遊
與農夫野老閒話桑麻無一語及作宦時事見之者不知其
曾爲貴官也

秦錫琈字璵友曲沃人由癸丑進士任繁昌知縣後補興安
調彭澤時彭數易令案積如山琈精勤檢閱不三月積案俱
清剔弊端奸吏畏民悅間以事赴諸村鎮裏糧自隨不以織
毫爲民累卒以勞勤致疾歿於官祀名宦

張體仁字悅巖浮山人少有至性事親以孝聞由歲貢選繁
峙教諭援例升戶部郎中奉差清查兩淮鹽務杜絕苞苴奏
免各商施欠代認織造賄累減費數百萬值畿南歲歉饑民

多北走入都復奉

命給資斧監送回籍就賑沿途宣

朝廷德意戒諭兼至事皆稱

旨擢守濟南正已率屬弊絕風清蝗蝻爲災捐俸捕治歲得大稔時東省糧米多積府治捐金三千建倉儲之旋升濟東泰武驛傳水利道總督田文鏡忌其清直密摺奏請內用諭旨以張體仁監司之任綽然有餘內調閒曹可惜弗允尋有督修曲阜文廟之

命皆特揀也厯官十餘年嘗一署糧道兩權臬篆凡肅清漕政平反冤獄興修水利振恤饑民所在有聲軍民胥愛戴焉遭父憂歸卒於家人僉以大用未竟爲惜云

栗培初字養元長治人績學能文雍正癸卯舉於鄉聘充陝

西乙卯同考官所拔皆名宿登乾隆丙辰進士授平谷知縣
抵任首革陋規遇事隨時聽斷案無留牘歲旱步驥禹澤山
大雨立沛明年秋澗水瀑漲沒禾民大恐親爲撫慰謂河水
迅駛易涸山苗無患已而漲落秋熟會有飛蝗入境輕騎偵
視焚香默祝蝗盡斃民以爲神在任數載興學勸農與閭閻
相爲休息以憂歸泣送者塞途羣立碑以志遺愛云性沈靜
寡營歸里後不預他事主講上黨書院多所成就登甲乙科
者至十餘人及卒門人私謚曰謙敏先生

賈健字天行汾陽人雍正五年進士以親老引歸十年服除
授懷遠知縣甫下車腥膻供輸一切釐豁嚴保甲設義學禁
浮葬期歲埋停棺二千餘十二年淮水暴漲田廬淹没健據
實請賑忤知府吳某健不之顧爭益力卒如所請復捐俸繼

之全活災戶無算未幾罷歸性高簡勵清操陋巷蕭然或日
高炊煙未起嘯詠自如授徒自給從之游者多脩飭有法度
年七十五卒著有四書會通一得錄詩文集明史纂要諸書
劉元錫字服章永甯州人雍正丁未進士知臨邑縣厯壽張
文登遷知德州擢青州知府改濟南府解任尋起權知沂州
府海甯陳相國知其賢薦臺諫之職會疾作卒於官元錫明
吏治所至有聲壽張東距會通河三十里而近古濟汶之會
由縣境以入海而宋熙甯中黃河決濱州趨壽張之張澤灤
明正統中決新鄉漫曹濮潰壽張沙澗故縣境多爲澗澇澤
民恆苦澆治之南沙嶺小龍等七窪其下雖舊有河形歲久
湮塞計民田五萬七千五百餘畝遇久雨輒沒水中元錫相
度地勢閩溝分洩導沙嶺窪之水由黃家岡出小龍澗諸窪

之水由五汊口出各設牶扼其衝前此蒞壽張者或議疏濬
卒恐有妨運道因循未敢興事至是而數萬畝民田無憂淹
浸文登濱海隅俗輕生婦女尤甚一歲之中自戕者至數百
十人元錫爲勸戒語俾鄉之老成人集男婦徧爲講說自後
輕生之案遂終歲無聞及爲府時以歷官二十載所躬自體
驗者十有五事成書一帙曰切戒欺飾曰隨事教化曰獎勵
善良曰矜恤窮民曰禁借命誣告曰清釐保甲曰設立義學
曰戒民輕生曰速審詞訟曰禁飭胥役曰詳慎初報曰矜恤
獄囚曰量捐積穀曰嚴緝盜賊曰整緝橋道渡船語皆樸實
以告所屬州縣其書題曰商言謙詞也當在文登嘗以事傳
保正某後期詰之惟俯首請罪怪其色沮問旁役則曰其家
有妖魅少違禍且立至彼若言又涉妄誕故不敢言元錫命

其人以狀訴歸未具狀妖遂絕

梁畋字郁亭介休人欽構從孫髫年喪父母寢苦攻苦不出戶庭者五年舉茂才文名日盛屢困場屋至雍正己酉登鄉薦年幾六旬矣明年成進士擢知涉縣事廉潔自矢愛民若子歲餘代者至解任去父老扳轍不得泣而送至境外者以萬計不數月代者以事去制府田端肅公文鏡雅重畋名且知涉人之懷之也復令往視事涉民聞之皆踴躍稱慶畋旣至邑不雨已八月卽出郊虔禱越二日甘雨沛四境歲獲大稔時鄰境咸以災聞而邑獨有秋上官疑之及按視得寔乃嘆異而去邑夙稱僻陋士鮮經術畋聽訟之暇卽進諸生親課甲乙由是科名踵起未幾舉荒之令下他邑多浮報取媚上官涉所清出不過數十畝兩充同考官所獲皆知名士量

移中牟濱河多被水災勞心振恤民賴以安作宰十年囊無
百金之儲以年老乞歸子五長文元舉人官曲沃教諭次文
霖三文山與旼同舉於鄉四文醕與長子文元並登乙卯榜
任宣城令季文五亦中式乾隆戊午科介邑梁氏故稱累世
科第而旼父子六人萃一門之盛尤爲難得云

賈權字爾衡汾陽人雍正中以諸生舉知宣城縣又權知甯
國縣舊例漕米折色徵收糴於蕪湖關議價必贏餘目爲出
洗權爲滌弊僅符時價正數民歌頌之其在宣城也始至卽
除免帶費銀三千諸陋規裁汰一清尤善決疑案廉能之聲
數月間卽謀遠邇涇縣民爭戶口及是百年矣至擊登聞鼓
事下卷牘山積援引百餘人巡撫曰此非賈宣城不辦卽以
委權察得其情實遂一言而決會行取擢主事權念父母老

又無他兄弟遂告歸宣城故有祠祀謝元暉李太白名二賢
祠民相與增之曰三賢肖像其中復建專祠於敬亭山
董淑典字宏訓介休人雍正七年以賢良薦授甘肅漳縣知
縣時西陲未罷兵邑之羸馬初皆役民徑送巴里坤往返幾
萬里百姓苦之淑典蒞任卽白於巡撫許改爲遞運未幾挂
誤歸乾隆元年以原官起用補陝西醴泉令邑多明季王府
地有司承上官意旨加糧二百四十石歲困徵輸淑典備陳
於制府鄂奉

詔予豁免百姓皆歡呼在任八年凡有利於民者悉舉行去
之日泣送郊外者數千人

王承堯沁水人丁未進士選入翰林以庶吉士奉
旨清查四川地畝剔奸釐弊核稽得實證卹民情所至無妄

蜀人服其公而感其惠復

命後授職檢討典王子山東鄉試號得人十三年教習宗室充治河方略纂修官考據精詳議者謂可與酈道元郭守敬相鼎峙乾隆元年

內廷行走和碩親王處課讀二年超遷翰林院侍讀左春坊左庶子轉侍讀學士尋擢詹事府詹事浹月四遷人稱異數三年升內閣學士兼禮部侍郎九年轉兵部左侍郎前後所上封事如請稽察武弁頂冒以肅營制查囤積以平穀價詳陳火耗歸公利弊及請定秋審處分等疏俱準議行因疾致仕卒年五十有六

張傳炤字義昭沁水人壬子舉人任江南常鎮道參議分部京口兵民雜處俗尚鬪競鎮之以靜清革宿弊所部肅然值

水利大臣督濬通州河道州牧不諳引水入港時二麥將熟
民恐浸漫訴之不得相率罷市巡撫飛檄調撥大通兵備道
傳檄急由海道兼程至率僚屬勘度地勢處置得宜民始安
堵大府知其能奏署臬篆會大水奉

旨賑濟發銀五百萬傳檄方權布政使出納明審念湖水泛
溢淮揚兩郡十數萬眾日在巨浸中無從得食迺設法餽運
所全活者無算以事謁制府疾作卒於江甯年甫四十有三
田懋字德符陽城人大學士從典子雍正中由蔭生選刑部
員外郎改吏部尋遷郎中轉御史乾隆元年遷禮科給事中
巡視南漕疏言巡漕御史四員向駐通州淮安漕艘經由南
至北二千餘里鞭長莫及宜濟甯天津各駐一員接續稽查
從之先後論奏河南撫按擬罪過爲寬縱工部尙書趙某受

餽倫安各降革有差遷鴻臚寺少卿尋超授副都御史赴山東察審按察使白映棠出入人罪及虐累商民鞠實抵罪相國某有弟不法見娶婦者豔其色攬歸按問款服治如律連擢吏刑二部右侍郎丁母憂服闋補吏部侍郎九年春不雨奏請清理刑獄催結外省未定之案以釋民累而迓天和吏部尙書訥親奏裁取舉人年力衰老者請停其銓選令甄別後學習一年將堪勝縣令者入班選用下九卿議時訥方貴幸部臣率多附和懋特疏詳辨仍從舊例以年少語言不謹所奏之事常洩漏於外忤

旨令回籍閉戶讀書十四年

命仍以吏部侍郎用尋因從役毆傷人命復罷歸二十六年迎

駕五臺

賜母錦帨增禧額及綵四匹歸構別業奉母居之號曰依園
孝養之暇著述爲娛三十五年卒所著有易庸辨卦變春秋
考實依園詩文集鳳臺縣志子玉成由進士選入翰林有文
譽工詩平定回部進呈

大閱及凱歌諸詩人多傳誦焉

王鈞字公衡鳳臺人以諸生貢太學議敘知府雍正二年授
浙江鹽運司副使時議以鎮江一府改食淮鹽力持以爲不
便

詔下淮浙鹽仍循舊界商民德之甯姚諸縣海潮被災鈞請
於鹽院奏免未完場課數十萬贍恤亭戶籠丁多所存濟西
湖久淤塞捐貲疏濬水利復興入爲光祿寺卿兼霸州水利

營田副使築圍建閘以時蓄洩耕耨胥按其節規盡盡善下
其法以爲式晉工部右侍郎轉左在部持大體不以苛察爲
明廷議時不立異同有所見則侃侃直陳常言國家公事祇
求一是無功可居亦無名可競真篤論也未幾卒於官鈞居
家孝友三世同居處鄉輕財好義無所憊惜居官有善政實
能見之施行論者以通才推之

秦嶠字方洲鳳臺人明敏有幹略以諸生杖策入都游公卿
間咸欽重之雍正七年援例以部員効力營田從朱文端公
軾綜理度支厯四年甚爲所倚任補戶部司務時天津營田
戶積逋累萬金力白於當事奏請豁免捐資築張昆口隄水
潦不爲害蔣文肅公廷錫稱其能薦授戶部員外郎經營畢
畫部中同事多拱手受成會以事去官復效力霸州營田悉

心贊理巡撫陳岱爲左右手孫文定公督直隸奏留河工與
陳中丞前後交章薦之格於部議以親老乞歸居鄉敦孝友
持節義修祠宇平治道途以義行稱子學溥舉人任江蘇糧
儲巡道以廉能著百里進士額州府知府別有傳

任舉字漢沖大同人雍正二年武進士署伯林堡守備巴里
坤軍營應援有功補安定堡守備乾隆三年署甯夏都司六
年實授七年遷固原遊擊十一年署城守參將十二月十八
日中營卒童文耀賈世忠等借名索糧糾各營卒夜劫提督
許仕盛奪南門入毀轅門柵攻署門未破舉聞譁卽單騎赴
鼓樓掌號站隊賊懼退掠市舉馳追擊手刃賊十餘擒四十
餘時所領僅五十人餘黨竄出南門分攻東西兩門舉急登
東城奮擊西門亦經右營遊擊鐵保放鎗驚散事定總督慶

復以聞

詔授中軍參將以旌勤勞明年十月奉

命馳驛赴金川軍營尋擢西風協副將舉至軍協攻色底賊
碉殺賊數百十三年正月總督張廣泗以賊徑歧險分路進
兵令率土漢官兵三千四百餘徑登昔嶺奪賊碉卡據要害
尋奏署重慶鎮總兵五月舉直抵昔嶺山梁據之山北二里
許木岡孤峯壁立爲昔嶺一帶賊碉及納喇溝二處總路賊
於隘口連數大卡並砌石城直官兵壘舉舍馬徒步冒雨拔
山而進取噶達達刺木岡等十餘處卡崙駐軍色而力山梁
已深入賊避其鋒退守石城不出城堅厚矢石如雨不能克
令伐樹人製一木枋以蔽槍石榷立木城深溝塹築礮臺因
風發礮石城鱗碎按步步圍城法攻之賊勢窮蹙遂持火具

薄城城上槍礮齊發傷左足賊悉出圍戰益力欲乘勢先登
伏賊起濠中斫傷右手刀墜地賊復趨至奪槍連刺數十人
俄中鳥槍洞胸撲地噀血大呼報國而絕年四十六時已奉
旨實授舉重慶總兵事聞照提督例

賜祭葬謚勇烈入祀昭忠祠蔭其二子官舉貳面修髯才勇
過人好學工詩夙嫻韜略感

上知遇每戰必先金川地險賊碉林立皆堅甚初攻色底碉中
彈二百僅圮一角廣泗又信漢奸降番言由昔嶺進兵專攻
所備舉知非策誓死宋入經略訥親至促戰愈力限期三日
取噶爾崖及舉死銳挫氣索均以償事伏法

上以失舉責將尤悼惜云子承恩字畏齋以蔭授都司能詩愛
士有儒將風官至福建陸路提督後以臺灣失事逮繫論死

以忠臣子終宥之承緒八歲授京營千總累遷遊擊救中西
市火被傷卒

武梓字東山靈邱人雍正五年由廩貢任甘肅漳縣知縣蒞任首革陋規數百金鑿渠引泉灌田歲倍收漳人享其利爲建祠以祀會西陲軍興奉檄辦理驛站以廉能調繁甯夏剔弊政除奸豪尋委勘災花馬池署同知廳篆所至頌聲作久之升秦州知州未赴丁母憂歸以上各府屬

曹立身字顯堂平定人雍正乙卯舉人知松陽縣縣介萬山中民醜樸教以禮義俗多溺女刊歌宣諭捐俸建育嬰堂置田贍乳嫗其風遂革他若興學校修志乘建橋梁平險途悉中地方利病士民感之卒於官遞道泣送爲建祠焉

鄭相字似僑定襄人天性明敏讀書務求實用舉雍正丙午

鄉試以知縣需次陝西分校陝閩所得皆知名士補府谷令
大苦循聲嘗兼署榆林神木葭州三印神木有殺人不得主
名者相至視致斃物乃門限下導知不出鄰里方傳訊間見
一人氣色有異給以他故片語卽伏眾驚爲神明積六年擢
乾州知州州當秦隴之衝民屯錯處素號繁劇難治相詰奸
禁暴興學課士案無留牘諸務畢舉職滿課最當遷引疾歸
遂不復出優游林下十餘年乃卒

牛玉怡字恭叔定襄人雍正癸丑進士授恩平知縣甫到官
丁父憂以母老不復出母服闋起補廣宗時鄰縣被蝗玉怡
至審知蝗必遠種令民於接壤處密掘阤及夏蝻果生其入
廣宗境者爲阤所阻遂不爲災乾隆辛卯春不雨捐廉募夫
築隄城外未幾霖雨連旬水暴至賴隄捍衛城中得無患民

以爲神名其隄曰牛公隄而建祠祀之尤善聽訟他邑有枉滯多乞赴廣宗居三年以疾辭代者至民始知遮留不聽去爲購屋餽粟請留十年玉怡不可更以期年約爲具與馬送之歸生平爲學深於易著有易解藏於家

李棟字元綸崞縣人領康熙癸巳解額乙未貢士雍正癸卯殿試選庶常改刑部主事旋歸翰林遷監察御史晉僉都父燕生專意理學徽服庭訓一以立身行道爲本其在刑曹專任現審司事論獄多平反上河清頌特稱

旨丁未會試以御史充同考官所拔皆知名士巡察畿南風節尤著擢湖南觀風整俗使時曾靜張熙倡爲悖逆煽惑愚民

朝廷欲簡一才守兼優之臣坐鎮勸迪之甚難其人高安相

國特薦徵遂有是命在楚四年察吏化民楚風不變而徵疾惡至嚴不避權要聲望愈重寵眷日亦隆忌者爭搆之竟落職還京左遷監督倉場積弊一空

高宗御極首錄先朝勳舊特復原官會當大用遞膺疾卒時論惜之所著有原本堂文稿藏于家

馮祖悅字鍾冀代州人雍正甲辰進士授戶部主事遷員外郎乾隆己酉典陝西鄉試出知甘州府擢洮岷兵備道以事左遷終於雷州府知府性樸誠守正不阿遇事務持大體始在郎署有能聲及典郡以治行上聞屢陞吏議皆奉

特旨起用嘗守陳州值淫雨相視城邑至西華之金龍隄水大至隄且墳有勸避者叱之躬督人夫守護隄賴以完任蘇州同知會

南巡解船赴清江浦至瓜州舟膠於冰不得進爲文禱於神
夜南風忽起三百里河冰悉解在雷尤多惠政徐聞有漁而
失罟者戲詢其鄰之五歲兒兒妄言在某所如其言得之遠
近競傳兒能前知就卜休咎者踵接令某遂以邪教惑衆聞
前守張其事逮繫至百十人祖悅至薄憲而遣之遂溪民韋
甲爲仇家誣以奸殺事巡道某力主之獄具祖悅審得其情
惻然曰典郡之謂何顧殺無辜以媚上哉卒改其讞厯官三
十年清操自勵不名一錢卒之日家無餘資子郢郊邵並工
詩文郢尤知名

張起雲字紫綬大甯人大同總兵自興子由行伍拔補把總
授太原鎮左營守備雍正四年遷福建撫標右營遊擊調延
平累遷湖廣桂陽營參將七年調福建水師提標中軍參將

上嘉其奉公不欺優獎之並通飭各省南澳上通閩洋下連粵海內地無籍之民往往潛出旬結爲盜起雲親率兵船巡查各處洋嶼嚴飭謹防獲濱海民舊通奸匪者勸以厚賞許其自新密爲耳目盜所至輒先知奸宄斂跡洋面肅清升署陸路提督明年調署廣東提督以疾未赴尋卒

諭曰張起雲才具優長實心供職簡任提督正資料理昨聞患病特遣太醫馳治冀其痊可今聞溘逝深爲憫惻應得恤典著察例具奏其柩櫬家口在閩著該督寬裕幫給路費遣

陳奏

官一員送回原籍尋

賜祭葬如例謚恪毅十年二月

上以起雲與將軍蔡良總兵蘇大有魏翥國皆素有賢聲勤勞
王事宜在賢良之例

命直省建祠祀之

以^{上各}州廟

右雍正年三十人

李天培字因其陽曲人布政如蘭子乾隆戊午舉於鄉辛未
成進士官工部主事洊升郎中授湖南衡永郴桂道甫十月
以官部時纂修則例事解任事白補廣西左江兵備道駐劄
南寧與安南連界夷倮雜處抵任後卽有小鎮安民搶擄安
南之事聞報馳往獲凶渠十數人檻上獄將具偵得首犯乃
故安南王莫登庸裔孫莫英流落雲南土富州爲人牧牛有

江西貢生劉德輝授徒其地見英有先世遺印教以假恢復
名私造印劄煽惑鄉愚天培具文言不獲英等其事未已當
事者以爲張大邊事邀功將劾之會天培已擒英及德輝並
所造印劄與同黨至乃寢戊子檄赴雲南辦軍差以條陳兵
備事宜罷歸天培自服官委心任運不以窮通得喪易其操
莫官工部時會保送御史當事者欲一至其家於畫稿日示
意竟不往及是藩司某以其清苦謀醵金五千爲捐復計辭
之歸後主講介休書院卒年七十有二子德申孫應均並於
甲寅舉于鄉曾孫甸亦舉人

楊愚字大智興縣人少讀書期於寔踐年二十三成乾隆己
未進士不欲卽仕歸與孫大令鴻幹考道論德相砥礪凡十
年初授福建詔安知縣俗多溺女設法格之後歷升柳州知

府所至振興文教詰暴妄良於獄訟研析至詳在閩時承審
侯官民婦致死本夫案婦堅不服一日調訊至夜將分愚詐
呵之曰爾夫至矣尙何飾辭耶忽其婦目瞪髮指作其夫語
厯數致斃始末狀語終仆地及醒不能復辨遂成信讞吏民
皆謂爲神然愚居心慈祥初不以摘發隱私爲能事嘗語人
曰做好官當在人不知處其語可爲市名者戒後卒於柳州
李全陽曲人生有勇略由行伍出征西番屢著勞績游升雲
南永順總兵將軍明瑞保任提督乾隆三十三年正月隨征
緬匪賊衆猝至全奮勇當前身中火鎗而死崇祀昭忠祠葬
祭如例子萬年世襲騎都尉又一雲騎尉補授四川遊擊征
金川有功厯升廣西右江鎮總兵

牛天界字馨宜太谷人乾隆七年武進士授藍翎侍衛十三

年出爲江西興國營都司累遷湖南寶慶協副將三十二年
擢湖北襄陽鎮總兵母憂歸服闋補四川川北鎮總兵會大
兵討金川天界協提督董天弼進剿三十七年正月大軍由
達本巴宗分三路趨資哩擊賊於瑪爾瓦爾濟山嶺連戰三
晝夜克卡十與大軍會天界分攻南山參贊五岱攻北山未
克天界以兵四百覓路伏箐中誘阿喀木雅賊出寨擊之賊
敗匿又破其援兵會參贊大臣阿桂代五岱攻北山築石卡
直下坡礮賊不支大軍應之天界亦由天山夾剿賊大潰遂
克資哩

獎賚之未幾阿喀木雅及得爾蘇賊亦潰天界親赴各岩洞
箐林捕逸賊自得爾蘇山巔下至河岸盡據之接北山麓尋
攻據喇卜楚克自達克蘇山麓進攻郭宗取德木達連攻城

奪其碉寨復隨大軍克布郎郭宗及底木達小金川賊酋僧格桑之父澤旺就擒三十八年三月大軍進剿攻噶爾拉天界冒雪登山口兩峯奪其碉賊由山後來犯督擊敗之將軍溫福奏請令轉貴州隨征兵卽署貴州提督

上如所請六月木果木大營失利溫福遇害天界力戰被重傷死之

賜祭葬如例謚毅節入祀昭忠祠

命圖形紫光閣儒臣擬贊曰綠營健將掃趙拉境躬犯矢石捍衛昔嶺經數十戰兵不挫衄于木果木臨危授命于騎都尉兼一等雲騎尉世職子敬一

特賜舉人官石城知縣敬憲襲職授都司歷官廣東羅定協副將

李永祺字松期陽曲人左江道天培弟也甲子舉人幼讀書講求致用之學由大挑分發貴州補書屏縣知縣升黃平州知州所至事無鉅細躬自聽覽暇則講析律令親爲批註剖決毫釐稍有歧誤則與明法者討論再三久之研究精熟雖老吏皆謂不及上憲器其才保薦授四川順慶府知府調敘州府知府正已率屬嚴而不煩務持大綱會兩金川用兵檄赴赤水站辦差尋復奉檄赴雅州南路承辦糧糈招商買米在事五六年儲峙充羨旋丁內艱仍奏留金川平擢守成都升松茂道旋授福建按察司閩中民風伉健訟獄滋繁獄上必反覆審核折衷至當兩署藩篆五十一年臺匪林爽文反平定留辦善後事宜曉夜督治以勞染疾卒

安璠字魯玉清原人戊辰進士授獲嘉知縣縣號衝繁苦差役丙子戊寅間旱疫並作流亡甚衆璠至招集撫循民多復業舊政有不便者悉革之奉檄修郡城工料咸徵諸民璠捐俸補其缺乏絲毫不爲民累大軍凱旋過境當路輒占民房璠懇請上臺至受譴呵不爲動民以是得無擾循聲大著旋以憂歸去之日百姓攀轅號泣有生子而名恩安者誌不忘也服闋以母老侍養不出母卒遂無宦情時高其行

張在字孝侯榆次人性木訥不苟言笑由貢選朔平訓導庚午舉於鄉用薦授甯晉知縣遇災賑濟悉心稽察民沾寔惠調任雄縣甯晉士民爲建祠立石焉雄有大猾呂三猴久橫鄉里下車後卽置於法逮近悅服督修濱灘各隄民踴躍趨功不日歲事時鄰邑亦興工當事檄縣助役在以民力未復

不堪重困縷述情形爲民祈請制軍方敏恪公語藩臬曰閉張令詳稟令人動爲民父母之思後升景州以郵傳絡繹久爲民累捐俸買馬以應嚴禁滋擾值夏旱設壇於二十里外徒步往禱適有星使過境見之因入奏

溫旨獎諭遷順天北路同知薦歸服闋補河南河捕同知旋擢曹州府知府蒞任半載以督工防河得疾遂不起子毓豐辛卯舉人任芮城訓導

康基淵字靜溪興縣人家貧少與兄基田同肄業於晉陽書院文譽藉甚時有裴馬杜康康之稱皆一時傑士也乾隆庚午舉於鄉壬申成進士歷宰河南甘肅兩省刺邑所至勸農桑建學校興脩水利性至孝體母王氏意刑民未嘗逾十板民間遂稱爲康八板然信義素著遠近懾服轉肅州時嘗有

悍回百餘騎與邊民爭利基淵單騎往視申明舊約回人帖
服稽首引去後擢廣信知府聞所屬有溺女習下車觀風卽
以據溺女規條策士擇其說之凱切者更推廣之錄示遠近
並設立育嬰局令士女互相勸戒行之三月其風遂絕未幾
甘省監糧獄起部議以淵前署蘭州府時曾爲藩司王某近
屬遂詐誤被逮尋卒於玉山舟次時年五十有二祀肅州名
宦嵩縣百合園並其母王祀焉至今香火不絕所著有家塾
蒙求文學纂霞蔭堂文鈔行世

馬全初名ழ陽曲人父雲翹由武進士厯提標遊擊隨征金
川進參將卒於軍全生時父方以守備官孤山堡土人感異
夢以告及生豐額高顴大耳方瞳父奇之長而膂力過人善
騎射乾隆壬申聯捷武進士以第三人及第授二等侍衛出

爲福建撫標遊擊以與同官忤罷職乃走京師更名全投巡
捕軍大學士傅忠勇公恆奇之仍命就試復登庚辰進士大
魁天下授頭等侍衛道際之奇閏動一時二十七年擢南昌
鎮總兵振飭營伍嚴查奸匪尋調江南崇明鎮羊山島久爲
海寇出沒之所設法遷巡奸究潛遁嘗舟行海上大風折桅
衆相顧失色全跪祝曰馬全如有負心明神殛之士卒何罪
視畢風息三十四年進江南提督旋調甘肅提督金川事起
請往効力加領隊大臣分駐控喀軍營殺賊二百餘級奪朔
卡十餘處時大軍屯木果木全分攻昔嶺斬獲甚衆然深以
元戎駐劄非所爲憂一日賊騎猝至軍潰將軍福遇害全殞
其後躍馬橫戈賊騎圍之數重矢石交集身被重傷力戰死
事年四十二事聞祭葬如例謚莊節崇祀昭忠祠子國璣世

襲騎都尉又一雲騎尉四十一年金川平圖形紫光閣

御製贊曰挾翼雖英御須造父設非其人良材徒苦陷木果
木將軍債轅殿後捐軀愧惜難言

韓本晉字桐裔太原人儀狀魁梧灑落工書畫爲文有先正
風名譽藉甚癸酉舉順天鄉試後由進士宰秀水政和守清
擒獲太湖巨盜陸大馬應魁等二十餘人民感其德祀於鴛
湖書院與陸清獻相次調任海鹽築海塘通水利革漕弊決
疑獄善政不一邑人立碑以紀其事碑文沈尚書德潛辭也
性喜宏獎所至之地以作養人材爲己任如蔣泰來吳蔣源
潘廷筠諸進士皆出其門後由邯鄲任以獲盜功升同知卒
孫榮前字緒鴻太原人生而穎悟甫五歲母鄭氏口授四子
書一過卽能成誦舉癸酉鄉試第一時考官爲金學士甡於

落卷中搜得者也明年成進士選授長甯知縣下車後詢民疾苦咸稱爲土豪所困豪有古姓者橫尤甚榮前廉得其惡迹置諸法其黨悉懼伏無敢復肆者調都昌邑之人如失慈父攀留走送踵相接也在都昌屢決疑獄爲大僚所倚重遷臨江府通判凡四爲同考官所舉皆知名士通守故間曹又別駐樟樹鎮日以講學課藝爲樂一時文士多從之遊未幾引疾歸里居一年卒著有謙受堂文集

康基田字茂圓乾隆癸酉以拔貢舉於鄉旋由明通授繁峙教諭丁丑成進士補新陽知縣調昭文庚辰乙酉兩科充江南鄉試同考官累遷至懷慶府知府旋調開封兼辦河防事務時豫省迭遭河患所需稻料向例按道省地畝攤派十束千錢追呼擾累民不堪命基田請發帑採買以蘇民困旣擢

河北道煮粥賑饑全活者以數萬計乾隆五十一年調江南淮徐道逾年升江蘇按察使有舊僚女孫妣離蒙難而志節堅貞者力爲湔雪且擇諸生蔣寅而配之蔣遂以是科領鄉薦吳中博爲佳話焉逾年升江甯布政使尋署河道總督防汛睢南河溢周家樓上游魏家莊復報險基田倉猝登壩搶護埽裂翻壓水底忽大溜迴旋衝埽復起因乘濤直上手觸船纜挾出層波登岸易衣仍立隄上督員弁卽夕協力搶護至三鼓埽定方回工竣

上聞其事優賜焉調署安徽巡撫以失察書吏革職留任旋被逮入都奉

旨發往河南以向知用尋奏署淮徐道五十六年擢江蘇按察使調山東仍兼管河道事務嘉慶二年擢江蘇巡撫旋授

河東河道總督五年河工大壞功已垂成猝燬于火奏請治罪奉

旨革職留任効力蒙

上諭康基田從前辦事尙爲熟練操守亦屬廉潔著於江蘇安徽江西三省內遇有知州缺出奏請補用六年補太倉州知州調署松江府知府七年擢廣東布政使十一年因公鐫級歸部以郎中用踰年由戶部郎中加知府銜隨同協揆長齡尙書戴衡亨馳驛赴河辦工

上諭以平日留心河務深中窺要升賞道銜並花翎尋以太僕寺少卿專管勾稽南河要工錢糧十六年大工告竣以年老乞休逾歲癸酉重赴順天鹿鳴筵宴

賓加三品卿銜是年卒年八十六道光中祀鄉賢及河南名

宦祠著有河渠紀聞合河紀聞晉乘蒐略諸書及文集詩集行世

馬瑋字瑞符全兄也癸酉科武舉丁丑成進士授廣東饒平營守備詮誤罷職留京營効力補東河沿守備升珠市汛都司累遷浙江定海鎮總兵時洋匪出沒無常瑋嚴斥堠謹巡察匪黨遠遁乾隆末調湖北襄陽鎮總兵赴湖南防苗事竣回鎮值教匪滋擾堵禦有方屢敗賊殲其魁七人嘉慶二年以功加提督銜赴川協剿時賊竄夔州文報不通瑋策勵將士戰於夔之放牛坪敗其前隊方深入突有別股自箐林中出瑋奮勇截殺力戰至張家崖山梁陡險身中數槍墜崖死享國祭葬如例子國鉉世襲騎都尉次國鉉蔭生

折遇蘭字佩湘陽曲人少而穎異才敏學博乾隆庚辰聯捷

進士授正甯知縣修城池築石隄捐廉振災撰修縣志調會
甯旋署靜甯州時兵差絡繹部署井然改署河州並有治績
母憂歸服闋補湖南瀏陽縣捐建義學振興書院當道素稔
其才調繁長沙旋遭父憂繼以祖母憂起復後知廣東普甯
縣尋調揭陽年五十以疾卒生平廉惠明敏所至俱著循聲
詩文書法各自成家著有舜山文集看雲山房詩草孫補山
相國袁簡齋大令皆亟稱之孫錦元嘉慶己卯舉人

閻廣居字子仁陽曲人乾隆庚寅舉於鄉分發湖南知縣歷
署常甯慈利耒陽芷江事所在以清釐積案杜絕苞苴振興
文教爲常在耒陽最久士風狡詐健訟廣居繩之以法而時
旌其善良俗爲頓易及去民思不忘署芷江時貴州小竹山
教匪滋事經晃州驛遷卒捕獲審訊無辜省釋甚蒙嘉慶二

年補麻陽縣其地爲鎮筸門戶苗匪出沒無常民多逃竄乃建石碉築城堡招撫流民募丁壯爲鄉兵自是苗不敢逼民漸歸業巡撫姜宸檄湖南兩省牧令皆仿爲之三年西晃山會匪張方興作亂廣居單騎掩擒散其餘黨以功擢乾州直隸州同知乾自兵燹後城郭壇廟悉爲瓦礫下車力圖修復設義學實倉儲教民開煤洞種一麥相度地利於灣溪雙塘等處建石碉十四石堡十三苗坊出入無刁斗之驚當乾陷時州守宋必椿力戰死乃以計俘厥渠魁祭於宋公祠又擒首逆石大貴磔之剿麻里灣苗親冒矢石斬獲無算敘功晉知府銜治乾四年以勞瘁卒年五十有七乾民哀哭罷市請於

朝祀名宦祠櫬歸祀鄉賢如例而麻陽亦立祀云廣居性直

諒敦行孝友博學能文手不釋卷平居聲色玩好一無所嗜與人交坦夷不設城府爲政不事苛刻嘗曰孔言忠恕孟言彊恕恕乃聖賢立心制行之本因以力恕顏其堂體行不倦著有力恕堂全集格言錄梓行子士驥士龍孫佩蓀並舉於鄉

張廷元字介臣太原人性穎敏十一歲能文乾隆丙子舉於鄉辛巳會試

詔正榜外加取中書四十人廷元與焉卽授內閣中書出爲潮州府同知潮俗健訟延案一訊卽決兩造帖服所駐黃岡歲祲振救有法擢署雷州知府遂溪令貪贓骯法論劾如律尋遷江西臨江知府屬吏之貪婪者聞風斂迹職滿引見諭以官居方面勵己率屬慎勿徇匱由此志操益堅事必

直辦明年南康災奉檄往勘時郡守與有舊誼欲不以實報
廷元曰田苗已枯我輩何心乃罔上虐民耶卒以災聞得賑
如例廷元童年喪母逢忌日每祭輒流涕居官清慎人以爲
移孝作忠云

孟生蕙字鶴亭太谷人乾隆癸未進士選翰林院庶吉士授
編修旋以大考罷職十五年

上幸天津生蕙於途次接

駕

命以六部主事用補吏部主事遷員外郎禮部郎中劉文正
公統勳以有爲有守薦擢湖廣道監察御史父憂歸服除補
江南道厯京畿道工科吏科給事中五十一年授鴻臚寺少
卿尋轉光祿寺少卿明年擢通政司參議居官二十餘年以

清直稱所建白如留省外用人員宜酌定章程以清銓法鄉會試宜停止彌封紅號房考不得互閱試卷外省簾官宜局入公所不得任意出入亦不得預分內外州縣守城兵役宜酌定名數以專責成先後十餘疏皆報可素簡亢以論事忤大學士和珅會疏劾直隸總督劉秉昌平開礦事措詞過當得

旨申飭和遽以革職請

特恩改爲降二級旋乞養歸家居奉母盡孝訓子弟以禮敝衣疏食泊然如儒素縣民素敦樸太平久家饒於力風尚漸華生蕙以身式俗力以儉約矯之尤喜獎掖後進聞同里士有文行者必造其塾叩所學往復敦勉娓娓不倦卒年七十

五祀三立祠

孫希元字仲和興縣人早孤勤於學事兄鼎元極謹終身無少忤由庚戌進士厯官貴州鹽亭新鄉北流知縣署古州同知宰鹽亭時邑有新娶婦甫八月而生子夫家欲出婦希元心知其冤諭以本縣七月所生遂罷訟完聚如初其惠政多類此在北流尤多治蹟及去祀入名宦鹽亭民亦繪像祀之歸後主講秀容書院每朔旦覺鼻端香氣繚繞久之始滅卒年六十有六著有詩文集行世

成汝舟字用濟文水人元震子也幼讀書能通大義援例入國子監以縣丞發陝西試用值新疆用兵佐治軍需挽芻輦粟甚著勞績補江南南匯令濱海民好訟素稱難治汝舟恩威並用不數月而民心帖然葺文廟建書院暨養濟院捐廉增汎兵口糧丁酉夏蝗憂之至廢寢食時露禱願減已年以

蘇民困會大雨海壩漲溢蝗蟲淹斃人以爲至誠感格云尤
究心水利白蓮涇新場河諸處汊港縱橫皆建閘廝渠時其
蓄洩農田百萬輸漑均資縣人刊石記之以最遷海門同知
會

高宗南巡留辦差工就升常州府知府歷鎮江江甯護鹽巡道
稽查龍江西新關鈔督辦江南災賑事以廉惠稱補淮徐道
防禦洪澤黃河運河海口區處得宜及五十二年高寶湖溢
以有備下游田廬不爲災云值河督李入覲

上諭成汝舟爲人結實有乃父風其世受知如此踰年升湖北
按察使尋卒年七十二子履恒別有傳

蘭第錫字寵章一字素亭吉州人舉乾隆庚午鄉試由大挑
任鳳臺教諭薦擢阜城知縣調永清並有惠政會大興員缺

制府特疏請升得

旨俞允勤慎彌著旋遷永定河北岸同知值河水漲溢身督
兵夫堵合凡三十五晝夜片刻未離工次由是受
高宗特達之知庚寅擢守正定府母憂歸服闋補岳州府知府
尋遷吉南贛甯道繼遭父憂未滿喪奉

命簡放永定河道時戊戌正月也永定河南岸七工方爲凌
水漫溢卽於工次受任督辦歲事踰歲庚子大雨河驟漲竭
力搶修獲邀優獎癸卯遂奉升署東河總督之

命時青龍岡改河初成溜勢趨向未定悉心籌度動合機宜
費不繁而工畢竣南岸新隄一百七十餘里一律鞏固踰歲
南巡優賚有加己酉調督南河抵任後周視南北兩岸凡洪
澤湖高寶堰及運河京口各埽坦閘座與僚屬悉心講求稽

工料簡單實設兵堡汰巡船日不暇給以節儉身先表率所屬翕然從之丙辰元旦

授受禮成與千叟宴

賜詩並毒杖如意諸物蔭一子入監讀書回任增修豐汎六
堡隄工明年疏濬靈壁鳳臺及豐沛二縣支河積勞成疾卒
於官性伉爽質直篤於孝友以廉勤荷

聖明優眷淳疇宣防所至勤求民瘼不以煦煦爲惠而利澤
所及使人久而不忘遇事虛衷諮詢擇而後行於義所當爲
則風發雷奮無稍依違顧忌居官數十年家仍舊築三廂無
尺寸田產囊橐蕭然惟舊書數簏攜以自隨著有永定河志
治河摘鈔吉州考諸書藏於家又輯南河成案若干卷存清
江節署以備稽考卒祀三立祠

段珍字介藩浮山人以商學弟子員舉乾隆壬申順天鄉試由大挑任福建平和知縣俗刁悍號難治有豪民奪婦婦田訪得繩以法皆翕然服公餘進諸生論文藝以作興之人競於學俗爲一變以最調侯官詰奸剔蠹力清盜源尋獲施德周等十六人皆閩洋著名巨匪也遷臺灣淡水同知尋知湖州府臺灣番民扶老攜幼望舟拜送檻酒數十里並刻石志去思潮俗健闊游棍多倚輩戶爲淵藪飭屬各遵行保甲嚴禁花船良民獲安尋署惠潮嘉兵備道兼攝鹽運分司以鹽歸服除補貴州鎮遠府中途丁母憂起復授四川敘州府時大軍征金川奏調承辦軍需以雅州隆昌驛委之事平調守夔州署茂松道旋授江西督糧道所在有循聲積勞成疾卒於官江西志列入名宦敘州人士亦羣爲詩歌頌其政績

崔錫榮字笏牀浮山人辛未進士授內閣中書改河南西平
知縣到官以經術爲治念地瘠民貧勞心撫字不妄笞一人
輕役一民以鹽莢壅滯罷職將論劾矣民皆攀轅臥轍流涕
追送不絕於道當事者察其賢慰留之量移寶豐勤慎自勵
設施一如治西平時嘗言爲政無他術第公則明耳咸以爲
名言職滿當遷以親老乞養歸退居林泉非公不至一時推
其清介

劉秉情字德引洪洞人幼穎悟七歲受書卽知深求義理年
十三父歿子濟甯間計辦踊哀毀如成人弱冠補博士弟子
員乾隆丙子舉于鄉辛巳中乙榜進士授內閣中書軍機處
行走一切章奏悉心講求恒夜分不輟援筆頃刻千言大臣
交重之遷吏部主事擢福建道監察御史戊子視南漕由臺

莊勘河自淮揚至瓜儀刷沙鑿石皆躬親履視江督及河漕
帥皆服其勤旋巡視南城進吏科給事中監賑粥廠見苞笠
蒙面者詰之乃逃脫旗奴也治如律已丑隨征緬甸旣駐軍
會夜雨以駝筐作榻上以繖蓋蔽之寢新城之戰先期催趨
木邦兵餉往返三百里次日畢集轉工科給事中遷鴻臚寺
少卿明年凱旋以功擢副都御史遷刑部右侍郎調兵部左
侍郎尋授倉場總督壬辰大兵進剿金川派辦西路糧運由
灌縣馳赴雜谷鬧爾以西不通騎路且無糧臺迺募商人借
給資本俾沿途擇要創廬舍以宿轉運者規措甫定又調赴
南路南路無夫站而道崎嶇輶邇尤不易乃核定穀數僱用
蠻地烏拉充運丁回空仍給口糧丁夫蹠躍事遂集十月師
進攻小金川路愈險乃招蠻民販羊詣營以六羊抵米一石

權宜濟之以功賞戴花翎授四川總督癸巳上元冒雪詣提督董天弼營商機務時小金川番人隨僧格桑竄入金川者皆稍稍逃歸中途遇之遮道拜賞以布帛爲陳利害番衆皆感泣將軍溫福之攻昔嶺也卽日馳赴木果木大營沿途修站餉運速繼悉與

諭旨指授者相符土司中綽斯甲布最强又金川之姻也名爲効順實持兩端秉恬旣督川其酋工噶羅爾布遣頭人生報吉謁賀意存窺伺乃反其饋面詰之頭人語塞因檄其酋而告以大兵之必不中輒土地之自有公斷詞嚴義正羣酋警服

朝廷益以此嘉之加太子少保會以董天弼措置乖方不早參奏降按察使仍留總督翎頂嘗赴策爾多催糧賊卒至蹶

彈從馬腹下過幸無恙一夕宿日爾拉途次覺有人趣之起以爲夢俄如前者再遽起催速行以火照路未里許賊大至會海蘭察兵至得免是年補職方司郎中隨擢吏部侍郎丙申大功告竣仍留川辦軍需報銷已亥正月以母病馳歸抵都已棄養矣偕仲兄扶櫬歸里營葬甫畢忽奉署理陝撫之命論以一時不得其人並非開在任守制之例不得已銜哀往明年徙雲南巡撫又明年權雲貴總督時安南國王以內地民人出邊爲辭咨請防禁語多乖制秉恬旣加駁詰備述天朝懷柔威德令查滋事者送內地推問奏入

旨嘉其得體壬寅楚雄水龍川江漸薄府城爲開引河復故道又次第修建撫仙湖盤龍江韓冕閘溉民田數萬頃至今爲利初己亥恩科耆儒得賜會試而滇省未及請秉恬以錢

兆基等補題漢人賜科自此始省垣舊有五華書院主講者必延名師親蒞觀風增其膏火一時人文蔚起丙午冬授兵部侍郎明年調倉場總督運麥至京例由司坊官與監督面兌而前此多假手書吏得勾通中飽自是官與官兌積弊爲之一除辛卯通惠河漲衝刷普濟閘因疏稱大通至通州石壩久未挑濬與其補綴于後不若綑繆于先奏入卽如所請壬子秋張家灣水急糧艘難進親赴督催覓縛夫四百人次旬完竣嘉慶元年與仲兄同預千叟宴己未授兵部右侍郎知武貢舉充殿試監射官明年進左侍郎未幾以疾卒所著有竹軒學古集行世

裴宗錫字午橋曲沃人父倅度

國史有傳宗錫筮仕濟南府同知尋升青州府知府調守

南乾隆二十四年遷濟東泰武道調督糧道二十八年調直隸霸昌道遷按察使遭母憂三十五年起補原官遷安徽布政司旋擢巡撫四十年調雲南巡撫尋署貴州巡撫踰年復撫雲南四十二年以疾乞休尋卒於任所宗錫性明敏廉勤有識度精於吏事守青齊時引博興湖諸水開稻田數十頃教民種櫟樹育蠶爲利甚溥及官畿輔猶以古北口山場產波羅樹卽櫟樹也但伐作薪不諳養蠶奏請勸民廣植試養以收繭絲之利在安徽開漳葭港河以利漕運江北鳳泗各屬素乏水利令高阜地多作池塘平隰悉厚築扞圍以脩灌漑而資捍禦及撫滇力除銅廠積弊撫黔開採鉛礦以濟京運皆規措得宜有裨國計而屯田牛皮大弩尤當時邊防所繫

諭旨嘉獎焉牛皮大箐者在古州丹江間綿亘數百里山深林密從前列屯置軍未思辦及宗錫閱兵古州察知箐內平曠之地有雷公院及歐收兩荒高箐諸處悉令附近屯軍試墾成熟後別立屯堡駐汛弁隸丹江營以資防守與箐外各汛聲勢聯絡苗疆益聞自倅貳起家厯監司數年卽任封疆盡心民事以誠實受知

高宗間干吏議卽

恩遇如初及卒

上軫惜之

賜祭葬如例子正文候選主事五十一年迎

駕於五臺

諭曰裴宗錫前在巡撫任內於地方事務尙能實心辦理伊

子裴正文現係候選主事念其得缺爲期尚遠著加恩交部遇缺卽行補用

翟聲煥字有章曲沃人乾隆戊申舉人選順昌知縣調將樂以憂去服闋分發湖南委修城垣工竣而民不擾凡疑獄多委令決尋署常德同知會江西棚民與湘潭土著構黨械鬪聚衆動以萬計有司莫能制將興兵聲煥微服潛往廉得實以聞誅其爲首者餘並散遣擢乾州廳同知威惠並施苗民戴德歷署衡州寶慶諸府及鎮筸兵備道所至茂著循聲道光庚寅

上以鎮筸苗疆重寄

召見奏對稱

旨卽超授貴職抵任值江華猺匪亂徵所部練勇會勦功爲

最後署湖南按察使以病歸卒

武開吉字泰古榮河人乾隆己酉進士授河南商城知縣縣沿明季弊政正賦外名目繁多苛派浮收歲折錢二千餘緡開吉至盡行裁革建義學五十二區刊

聖諭廣訓購小學諸書分給之俾相講習又倡捐賓興經費俾寒畯應試有資士民頌之光山有鬪殺案已論抵矣其人曰必到商城武青天堂上民雖死無怨大府卽委開吉覆訊寃果白固始大猾王某率黨劫掠開吉迹所在擒之案問如律一時稱快以廉能調繁商邱而開吉爲令久頗厭更事乃援例內遷授兵部員外郎旋以老辭歸教授鄉里以終子錫瑄舉人錫瑞拔貢

荆道乾字健中臨晉人乾隆己卯領鄉薦以知縣試用湖南

署麻陽值苗匪不靖官兵所過水陸役使民夫爲核減其數
民無擾累移署東安決疑獄白其冤衡州巡南食粵鹽粵商
入楚故事饋東安令千金力卻之上官重其操調永順旋膺
卓薦遭母憂歸服闋署慈利縣補龍山旋調署靖州州境嵒
祲設法平糴而賑其疾癱無告者民無流亡安鄉民有兄弟
爭婚於某甲致母自縊者獄具議死者五人大吏疑之檄道
乾覆訊廉得某甲悔婚及陵欺狀坐以罪餘責而釋之人服
其平復以卓薦遷甯夏府同知署肅州修復水利邊民惠之
時關外玉禁甚嚴有賈人持重金夤緣者峻拒之五十三年
升知池州府厯署蕪湖道江安糧道朱文正公珪巡撫安徽
尤信任凡六攝蕪湖道事關稅贏餘悉以存公五十八年調
知安慶府文正公入都首薦之先是劉文清公墉撫湖南廉

其治行稱爲清官第一屢言於朝至是

高宗召見褒諭備至擢山東登萊青道嘉慶元年攝布政使明年升山東按察使時驛傳銀由各州縣遞解藩庫轉撥臬司各屬復從臬司支領道乾謂多一往反之勞則虛糜之費益甚會推江蘇布政使

陞見奏及之因請州縣坐支經費悉於地丁內存支

俞旨允行天下稱便四年六月到官八月升安徽巡撫感念知遇益勵清節圖報稱於地方積習竭力整頓不避嫌怨有所條奏語皆質直無華雖以此得過不悔甫踰年以勞瘁感疾上疏乞休

諭以卽在江省調理痊愈來京簡用次年三月卒年七十二遺命不受賄贈屬吏入視敍見布衾而外室無長物莫不欷

息流涕柩歸土民爲罷市

賜祭葬如例孫炆蒙

詔見特賜舉人十六年公舉入三立祠

薛天相字吉人臨晉人純謹嗜學乾隆戊申己酉聯捷進士授四川儀隴知縣時教匪騷擾軍興民困征輸又窮治黨與動多株連逃亡相繼天相至竭力招撫凡歸正者概釋弗問情恕理諭跳梁馴服境內肅然後調渠縣署撫民理番同知專以培養人才爲務三校鄉試所得多名士一時有薛青天之稱又曰薛夫子解組歸兩袖清風家徒四壁

王遐齡壺關人幼聰穎善爲文工書法乾隆癸卯舉於鄉以知縣分發四川歷署丹稜青神諸縣有政聲嘉慶己未攝中邑篆甫數月教養兼舉士民感德越明年教匪滋事中邑距

賊鋒尤邇士民相率赴省懇請假王明府爲保障計因奉檄
星馳就道民望見車蓋交相慶曰明府至吾儕無慮矣遐齡
集士民商守禦策衆踴躍聽命乃與修器械浚城隍令遠者
結寨自衛守望相助近者分爲十二團置首領朝夕訓練其
險要處暗藏精壯以爲聲援部署甫畢賊已擁一二萬衆由
定遠渡嘉陵江蹂躪射洪等縣長驅中邑盤踞數日百姓扶
老攜幼入城避難遐齡內撫外捍倡率堅守擒奸細立誅之
繼大兵追賊至賊乃遁百姓稍稍返故里其被脅之民皆詢
其里居設法護送以守禦功卽奏補中邑蠲租賦以恤災區
立差局以均供億建書院以興文學教養兼施民氣大和蒞
任六年遷打箭鑪同知去民繪像以祀

申瑤字鶴翔壺關人少穎悟嗜學舉乾隆己亥鄉試己酉成

進士授兵部主事轉河南道監察御史出爲廬州府知府遷
知懷慶調蘇州再調安慶引疾歸年七十七卒瑤性勤謹熟
於掌故在部曹能舉其職居言路以伉直稱連典大郡所至
多惠績其初守安慶值水災督所屬晝夜巡視至廢寢食被
災之區咸振恤得所甲戌江南大旱饑民遍野瑤時調知蘇
州捐俸倡賑得金數十萬全活無算喜文士接引後進孜孜
不倦廬州學安慶試院悉出資新之劬學至老弗衰所得俸
盡以易書歸里後謝絕人事課子姪爲娛嘗語人少時得漢
書一部如貧兒暴富今籤皮頗裕足以自豪恨老不能遍讀
耳子湛恩亦以文學知名

李錫嘏字如九臨縣人乾隆乙丑進士厯知陽武及杞縣始
至陽武值水災親視民間疾苦請帮助賑及冬復捐俸并勸

富民輸粟煮賑民賴以不至失所在杞尤多惠政歲饑盡心安集振恤亦如陽武當事以堪勝知府保舉擢署衛輝旣而同知開封督漕卒於途次祀人立祠西郊祀焉

梁錫璵字鶴軒介休人少舉於鄉資稟透明遂於經術乾隆辛未

詔天下舉經學士與陳祖范吳鼐顧棟高同被

召卽授國子司業厯官至祭酒晉少詹事生平胸懷渾浩與古爲徒唐宋以下書非闡發六經有闡誠正之學者悉屏不觀於諸經亦多論著而尤精於易家素封以讓產於諸昆季遂至無立錐地入詞垣著述無不稱

旨所上易經撰一

特命翰林中書官繕錄備

覽官大司成時設舉比環諸生聽講微言奧義日出不窮槐市人才頓爲改色同朝卿大夫如錢香樹蔡葛山張樊川朱春圃吳易堂諸名公皆以大儒師友之

曹學閔字孝如一字慕堂汾陽人癸酉進士由檢討改河南道御史擢刑科給事中分校己丑會試轉吏科時三輔亢旱奏請清理庶獄朝審三次緩決人犯減等發落卽日詔施行居言職八年所敷奏皆有關

朝廷掌故與吏治民生有裨益者出是受知

高宗多報可擢鴻臚寺少卿轉光祿寺厯通政使司參議太僕寺少卿以復陳會試舉人徑由州縣出結送部降調踰年復補鴻臚寺少卿尋遷內閣侍讀學士分校甲辰會試先是學閔在臺諫嘗上言宜復辟雍古制下禮部議格至是

高宗將舉行臨雍禮乃創建辟雍於國學追理前疏

特旨嘉獎之五十年預千叟宴拜

御製詩刻鳩杖文綺之賜明年擢宗人府丞以疾致仕歸踰年卒學閑性樸誠敦本行幼孤勤苦自立蒞官清慎負重望與人交不苟然諾排解急難無倦色於表章先賢振恤孤貧諸義舉必躬親擘畫晚年講求性命之學泊然窅默幾於靜得著有紫雲山房詩文鈔子錫齡祝齡

曹錫齡字受之乙未進士授編修典庚子四川鄉試尋督學雲南歷監察御史擢戶科給事中轉吏科嘉慶中以目疾乞歸性篤摯秉正不阿在臺諫十餘年所陳封事以培元氣崇治體爲要有請祈雨日停止人犯句刪增設京師粥厰及散給棲流所棉衣修國子監南學慎重軍機關防諸捐與弟祖

齡少受學於大興朱珪嘉定錢大昕之門親聞緒論以故立朝有聲諸經皆承講授著有周易集粹諸書及詩文集卒年八十一子汝淵字春浦嘉慶己未進士由庶吉士改刑邵主事出爲涇州知州卒弟祝齡字申之乾隆己酉進士歷官戶部郎中負幹濟才饒膽識佐司農有聲而澹於榮利中年後乞歸南遊吳越東登泰山歸築生雲精舍讀書觴詠以終閭秦和字魯瞻平遙人幼奇特有神童之目長益力學乾隆庚辰領鄉薦選河津教諭壬辰成進士由禮部主事累升本部員外郎中旋擢河南道御史稽察富新倉奉命巡視南漕向例浙江尾幫江蘇北幫銜尾而進是年湖北頭二幫漕船已有行抵儀徵者泰和以江中風濤洶湧恐有疏虞不敢拘於成例商之漕督飭令收入瓜口仍讓浙江幫前後奏聞蒙

溫旨嘉獎署吏科給事中巡北城首嚴匪徒之禁復以婦女入廟燒香爲風俗人心之害所屬城隍廟向有清明賽會之舉先期出示禁止嗣巡東漕差竣仍巡北城升內閣侍讀學士遷太常寺少卿轉通政使司副使擢太僕寺卿尋任順天天府尹嘉慶六年夏大雨水陡發奉命查勘順屬被災情形悉心籌畫災黎無所者都中養濟院功德林留養貧民向以清明爲止是年被災後設廠放粥泰和會同籌議展限一月奏上得

旨俞允九年因公部議請銜級

特旨以四五品京堂補用旋擢太僕卿因車覆受傷解任調理卒年七十有五弟燮和以武科起家亦於壬辰中一甲二名進士官侍衛

張敦仁字古愚陽城人幼聰穎博覽羣書乾隆乙未進士任高安知縣調廬陵所至弊絕風清厯署松江蘇州諸府調江甯府署江安十府糧道在蘇時值歲歉民賣耕牛延生敦仁捐貲廣畜來春得雨聽民取贍民甚賴焉授吉安府知府調南昌未幾署吉安守某上吉安反狀巡撫委敦仁以兵討之敦仁請單騎往訊得情知爲私闊抗彈之按法得從未減又會匪肆行掠劫富民爲保家計多佯附之而實未身與及事發株連盈固圉敦仁覆訊察其冤盡釋之簡授雲南清軍鹽法道剔弊端政肅清服官四十餘年公暇卽事著述其學浩博無涯最精考訂於樂律厯算皆洞極精微一時名士如鄭夢卜周慶菴皆出其門阮文達公元尤推重之著作繁富白下兵燹後什無一存惟爾雅圖考算書尙有藏者年八

十二卒子薦染副貢丙子魁於鄉授海豐令保采亦由副貢領乙卯鄉薦厯任伏羌和平令皆有政聲

王熙載字宅揆鳳臺人乾隆辛未進士署大城知縣遇大水悉心振濟邑無流亡題補新城地當驛衝差務絡繹事辦而民不擾會畿南旱蝗所過禾稼無遺而不入新城當事異之乃檄赴各邑捕蝗所至申令甲禁驅擾方盛暑盡日夜奔馳因之致疾事竣大府以爲能復委辦密雲道路力疾而行病劇遂卒

秦百里字宛來鳳臺人辛未聯捷進士選庶吉士散館擢編修己卯典試貴州充庚辰會試同考官尋奉

命提督河南學政澤與懷衛錯壤多姻戚胥以嫌避不與試在職矢公慎謝請託士論翕如會許州試竣道經尉氏值黃

流漫溢漂廬舍災民多棲樹杪或聚處土阜號泣絕飲食百里慨然曰士與民一也吾以學臣爲國家取士卽當爲國家愛民敢以職非所司聽斯民之陷溺耶遂率令尉購備船筏乘月夜渡之入城復捐餘金爲賑全活者數千百人露章入告奉

旨溫慰民爲立石以誌差竣復

命詢以豫省民風士習大吏操守才能奏對稱

旨尋授潁州府知府

賜紫貂等物抵官以疾卒於途次百里循謹自持弱不勝衣讀書談經濟不爲章句學雅爲劉文正統動孫文定嘉淦寶侍郎光鼐所知著有和聲集子槐庚寅舉人安徽試用知縣張大經字建常鳳臺人辛未武進士第一人及第由侍衛擢

武昌府參將遷文登副將

高宗南巡辦理德州煙火廠臨清河巡哨

恩賜貂綬有差進陝西興漢鎮總兵金川用兵調赴軍前守牛廠木兒寨諸要隘進兵攻明郭宗有功旋提兵守達咱夾山聞木果木大營兵潰卒衆往援遇賊奮力衝殺自夜至日晡士卒盡憊風沙四起賊衆乘勝據高阜列槍礮隨所向環擊身被重創嘆曰吾大臣不可汚賊手遂投崇德站之海子而死事聞

命入昭忠祠遣官致祭照旗員二品大臣例世襲騎都尉子無咎蒲河營都司

王鍾字春融鳳臺人侍郎鈞弟也與鈞相友愛鈞卒於都奔持其喪歸援例授戶部員外郎擢刑部郎中西番互市之役

有司經畫未善以鏗代任區處得宜邊人悅服會大軍進討
金川鏗督餉入蜀而母訃適至便道歸里一慟而去馳詣軍
門請出家財助餉量道途險易設法飛輶剋期集事凱旋加
太僕寺少卿銜許終制服除補刑部直隸司郎中改廣東司
出爲延綏道歲屢旱力爲振恤西師旣興奉委採辦駝隻以
及馬政邊儲羽書如蝟鏗心盡手揮以次就理制府以其才
可大用疏請裁榆葭道併歸延綏駐節榆林

朝議報可卽以鏗任之榆林地當衝險爲全秦保障每率數
騎穿帷按部問民疾苦除豪猾安善貞枹鼓不驚苞苴盡絕
未幾勸農至雄石峽以勞瘁卒編修蔣士銓銘其墓

劉柏齡字靜山鳳臺人以資爲刑部郎庶獄多所平反俸滿
以道員薦力辭劉文正公統勳稱其廉靜過人不慕寵利奉

差廣東陝甘審案皆明允旋授軍機處行走律例館纂修數年告歸優游林下二十餘年未嘗入公門晚年家貧探守益堅祁姓有大獄持萬金求爲開說笑而卻之郡縣舉行鄉飲必請觀禮以爲士林式焉

右乾隆年諸府屬四十二人

山西通志卷一百三十四